



# COOK ISLANDS CHRISTIAN CHURCH

## Executive Council

Head Office Phone: 26546 Fax: 26540 Email: adminpub@oyster.net.ck P.O. Box 93, Rarotonga, Cook Islands

~~~~~

1 Tepetema 2005

Ki te au tavini rave angaanga katoatoa i roto i te au Ekalesia CICC i te Kuki Airani nei, New Zealand e Australia

### **KARERE MEI ROTO ATU I TE KUMITI AKAAERE**

#### **1. Akatomoanga**

Kia orana e te au taeake i roto i te Mesia,

Kia akameitakiia te Atua mana katoatoa koia tei oronga mai i teia tikaanga manea kia aravei tatou na roto i teia aenga pepa no te taime mua mei te tuatau mai i topiri ei ta tatou XXVI Uipaanga Maata i te marama i topa. Teia te irava akaaravei ia tatou i roto i te akarongo: *“E rekareka maata au ia Iehova; e rere ua taku vaerua i te rekareka i taku Atua; kua akakakau mai oki aia iaku i te kakau ra i te ora; kua tapoki aia iaku i te kakau pu ra i te tuatua-tika....” (Isaia 61.10).*

E karere teia tei anoano te Kumiti Akaaere i te tuku tika atu kia kotou ma te irinaki e kia akatotoa iatu te reira ki roto i te koro o te Atua ta kotou e tiaki na i teia tuatau. Ko te vaerua o teia karere koia oki no te akakitekite ma te akamaaraa atu kia kotou e ta kotou au Ekalesia tapu, i te au mea puapinga kia vai ki roto i te ngakau e te manakonakoanga i teia tuatau e noo atea nei tatou, e tae uatu ki te atiangā e aravei akaou ei tatou ki te ngai e te tuatau tei akonoia.

Na kotou e akara e, eaa ra te atiangā tau kia kite ta kotou Ekalesia i te au mea i raro nei; penei i te tuatau e uipaanga i kotou, penei i tetai atiangā ke. Kia rava te akakoromaki me ka roa teia karere.

#### **2. Reo Akameitaki na te Kumiti Akaaere Ou**

Kua anoano te au mata i runga i te Kumiti Akaaere tei akaouia i teia tuatau, i te oronga akakite akaou atu i to ratou reo aroa e te akameitaki i te au Ekalesia katoatoa tei tuku mai i te apainga akateretere i ta tatou akonoanga CICC ki runga ia matou i teia tuatau. E ngateitei teia ta kotou i oronga mai kia matou kia oe ma te akatika i to tatou vaka Evangelia no nga mataiti e 4 e tu ki mua ia tatou. Ka pati matou kia kotou katoatoa kia pure mai no matou kia maru ua tatou i te kaukau marie anga ma te ngaueue-kore na roto i te mareva maata o nga mataiti e tu mai nei.

#### **3. Akonoanga Tieniangā i te au Taeake Rave Angaanga**

Kua rave te Kumiti Akaaere i tetai akonoanga tieniangā (hand-over function) i te apainga o te aronga rave angaanga meia ratou tei akangaroi atu, kia ratou tei ikiia mai ki runga i te au taoanga, i te Paraparau ra 18 no teia marama Aukute ki Takamoa. Kua rauka tetai akairo i te maani ia e kua oronga iatu kia ratou tei akangaroi atu. Ko teia akairo i roto i te rua o to tatou reo papaa koia oki e **Cerficate of Recognition for Services to the CICC Administration**. Kua taina iatu teia

|                                                                                                                                                                                                                                                                                                                                                                                                          |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p><b>President:</b> Rev. Tangimetua Tangatutai Phone: 26541 (home)<br/><b>General Secretary:</b> Nga Mataio Phone: 23900 (home), 28711 (work) Fax: 21881 (work) Email: cimoa@oyster.net.ck (work)<br/><b>General Treasurer:</b> Oki Teokoitu Phone: 23435 (home), 22680 (work) Fax: 20566 (work) Email: okirua.teokoitu@hsbcpb.com (work)<br/><b>Principal:</b> Rev. Vaka Ngaro Phone: 26452 (home)</p> |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

akairo e te Orometua Ngateitei e pera te Tekeretere Maata o teia ra. E akairo teia te ka vai ki te vairanga ei akaraanga na te anau, kopu tangata, te uanga ka anau mai ki teia au taeake tei rave maroiroi i te angaanga e rau te tuatau.

#### **4. Uipaanga Mua a te Kumiti Akaaere**

Kua rave te Kumiti Akaaere ou i tana uipaanga mua i te Ruirua i topa ra 23 no teia marama Aukute. Ko te akamata anga tika'i teia o te angaanga a te kumiti ou. Kua akarakara ma te uriuri te kumiti i te au tumu manako e manganui tei anoanoia kia akaoti ia i teia tuatau e i mua ake i te uipaanga maata e tu mai nei. Tetai o teia au tumu manako koia oki to te akonoanga CICC enua i Te Puka, Nikao, ngutuare ou (new Administration block) i Takamoa te ka maani iatu penei a teia mataiti ki mua, tuatua no te moni, e te vai atura. I roto i teia tuatau, kua parani te kumiti kia uipa aia i te au marama katoatoa no te maata i te au mea tei anoanoia kia rave iatu no te meitaki o ta tatou nei akonoanga.

I muri ake i teia uipaanga mua a te kumiti, kua rauka tetai tikaanga manea i te aravei atu i te tavini o te Atua tei pou tona tuatau e tei oki mai mei te enua Tahiti e tona ngutuare tangata, koia te Orometua Tinirau Soatini. Tena kua tere atu ki Sydney, tapapa atu ei i te kapikianga te ka tae kiaia no te rave uatu rai i te angaanga tapu a to tatou Atu. Kia akameitakiia teia taeake tei rave maroiroi i tana tuanga i Tahiti e kua tae ki te openga ma te meitaki e te au. Kia tika ia kotou i Sydney e Australia na, atoro ia mai to tatou taeake me tae atu ki to kotou akapuanga.

#### **5. Au Tumu Manako tei Arikiia i Roto i te Uipaanga Maata (Resolutions)**

Irinaki au e kua tu pouroa kotou i te kapi (copies) o te RESOLUTIONS tei tu'a ia i te ra topirianga o te Uipaanga Maata. Me kare koe/kotou i tu, akakite viviki mai kia tukuna iatu tetai na kotou.

Ko tetai tuanga teia tei anoano pakari te kumiti kia apai e kia aru te katoatoa, i te au ngai tika'i te ka iri ki runga i te Ekalesia tatakita. Teia i raro nei tetai au akaraanga:

*Ka uri kotou i teia au manako, kotou tika'i e te au Ekalesia kare i rave ake i teia, akaoki mai ei i ta kotou tika ki roto i te uipaanga maata e tu mai nei:*

- a) Tuatau uipaanga kia akatere iatu ki te 4 mataiti
- b) Taangaanga anga i te au apinga akatangi i te tuatau pure akamorianga
- c) Akakotinga anga i te tuatau rave angaanga o te au mata i runga i te Kumiti Akaaere ki te 2 tuatau (terms). E manako teia tei tuku atu au ki te katoatoa i te tuatau topirianga o te Uipaanga Maata. Kia tika ia kotou kia uri katoa i teia tumu manako.

*Ka taangaanga kotou i teia au manako i teia taime:*

- d) Teretere anga o te au tavini o te Atua ki vao ake i ta ratou au Ekalesia kia akakiteia mai ki te Kumiti Akaaere i mua ake ka tere ei
- e) Ko kotou i New Zealand e Australia, kia akanoo kotou i tetai parani no te au tere te ka tere atu mei te Kuki Airani atu nei no te akakoroanga kimi puapinga. Na kotou te tika openga e koai ma te ka tere atu e, eaa te tuatau e reva atu ei ratou
- f) Kia tuku mai i ta kotou au akapapaanga moni i te openga o te au mataiti katoatoa kia rauka i te Mou Moni Maata i te kite e i te akanoo i ta kotou akapapaanga moni (budget) no te pute moni maata, kia tau ki te puapinga e rauka maina ia kotou
- g) Akamaroiroi mai i ta kotou au moni ki te pute maata, kia ngoie ua ia kotou i te tomo ki roto i te uipaanga maata o te au tuatau ki mua ma te tamanamanata-kore ia
- h) Upoko leta ou kia taangaanga ia (akara ki te **tuanga 6** i raro nei)

## 6. Upoko Leta Ou a te Akonoanga CICC (new letterhead)

No te tuketuke i ta tatou au upoko leta (letterheads) e taangaanga nei i roto i te au Tipatimani e te au Ekalesia tatakitai, kua manako ireira te kumiti kia pati atu kia kotou katoatoa kia aru i te upoko leta e tuku iatu nei i teia taime. Tena ta te kumiti letterhead te kite na kotou. Ka rauka ia kotou i te tauru i to kotou au addresses e tetai atu au mea puapinga ki runga i teia letterhead i raro ake i te upoko tuatua **Cook Islands Christian Church**. Ko te mea puapinga koia oki kia aiteite a runga rava i te letterhead a te au Ekalesia e te au Tipatimani CICC katoatoa. E tai oki o tatou vaka e tere nei, e mea manea ra'i e, e tai uake o tatou tira kia tamou.

Ringi mai iaku me kare teia akamarama anga i rava meitaki.

## 7. Ngai Uipaanga o te Uipaanga Maata, Mataiti 2007

Ko kotou i New Zealand na, te oronga atu nei te Kumiti Akaaere i te tikaanga kia uipa e kia uriuri kotou i te manako no te host anga i te uipaanga maata e tu mai nei i te mataiti 2007. Ka inangaroia to kotou manako i mua ake i te openga o teia mataiti 2005, kia rauka i te Kumiti Akaaere i te akakite vave ki te au Ekalesia katoatoa. Me akakite vave ia oki, e tano ei e ka rava te tuatau teateamamao no te au taeake e noo nei i te au ngai mamao (mei te outer islands i te Kuki Airani nei) no ratou i te tapapa no te tere atu. Me ka ngata ia kotou i kona na i te host, e maata te au ravenga i te akamama mai i teia apainga; ka rauka tetai tuatau no tatou i te uriuri i te reira me kua anoano kotou.

## 8. Ngai Nooanga Tinamou (Contact Addresses)

E mea puapinga maata kia akakite mai kotou i to kotou au ngai nooanga ou, i te tuatau e tieni ei kotou. Ko tetai mea puapinga e kitea mai nei koia oki ko teia mea tei tuatuaia e, e Email; ka karanga tatou i roto i to tatou reo e, e **Emele**. Ko te ngai meitaki o teia ravenga kave karere koia oki me tukuia tetai karere na roto iaia, ka tae te reira ki te ngai tei anoanoia i taua ra rai. No reira ko kotou e te au Ekalesia e apinga ta kotou mei teia rai, tuku viviki mai i te **Emele Address** kiaku. Ka rauka oki te au pepa mei te karere, tia, newsletter, e te vai atura, i te tuku atu kia kotou na roto i teia mataara, tae tika atu ei kia kotou i roto i te ra okotai. Ko kotou kare e mea mei teia, kare e manamanata ka tuku atu rai i ta kotou au me're na roto i te post.

## 9. Popani

Irinaki au e te au tavini o te Atua e kua rava teia akakitekiteanga no tatou i teia atianga. Meitaki maata ko kotou tei akakoromaki i te tatau i teia karere roa. Mei taku i pati atu i te momua o teia leta, e mea puapinga kia kite taau Ekalesia tapu i te au mea ta te Kumiti Akaaere e oronga atu nei na roto i teia tataanga.

Akamaroiroi i te au apainga i roto i to kotou rima i teia tuatau; ka pera katoa matou i runga i te kumiti i te rave maroiroi anga i te au angaanga tei orongaia mai ki to matou rima. Teia te irava popani no tatou; *"E ko te ka o mai i tetai kapu vai anu na tetai o teiane i aronga tangata rikiriki, no te mea e pipi aia naku, tika'i taku e karanga atu kia kotou, Kare takiri aia e ngere i te tutaki"* (Mataio 10.42).

Kia orana i te ingoa tapu nui o to tatou Atua ko Iesu Mesia, Amene.

Otira ua, .....  
  
 Nga Mataio  
 Tekeretere Maata

Attachments: CICC Office bearers  
 Sample letterheads

**CICC NEW OFFICE BEARERS – 2005/09**

---

| <b>Position</b> | <b>Previous Holder</b> | <b>Current Holder<br/>2005/09</b> |
|-----------------|------------------------|-----------------------------------|
|-----------------|------------------------|-----------------------------------|

---

**EXECUTIVE COUNCIL**

|                            |                                 |                                 |
|----------------------------|---------------------------------|---------------------------------|
| <b>President</b>           | Rev. Tangimetua<br>Tangatatutai | Rev. Tangimetua<br>Tangatatutai |
| <b>General Secretary</b>   | Mr. Willie John                 | Mr. Ngatokorua (Nga) Mataio     |
| <b>General Treasurer</b>   | Mr. Tangi Kapi                  | Mr. Okirua (Oki) Teokoitu       |
| <b>Rep/Overseas</b>        | Mr. Kura Strickland             | Mr. Kura Strickland             |
| <b>Rep/Northern Is</b>     | Mr. Taepae Tuteru               | Mr. Taepae Tuteru               |
| <b>Rep/Southern Is</b>     | Mr. Tuti Taringa                | Mr. Taivero Isamaela            |
| <b>Rep/Raro Konitara</b>   | Rev. Nio Mare                   | Rev. Nio Mare                   |
| <b>Rep/Ministers Comm.</b> | Rev. Ngametua Mautaiiki         | Rev. Ngametua Mautaiiki         |
| <b>Principal</b>           | Rev. Vaka Ngaro                 | Rev. Vaka Ngaro                 |
| <b>Legal Adviser</b>       | Tina Browne                     | Iaveta Short                    |

**DIRECTORS**

|                                |                   |                   |
|--------------------------------|-------------------|-------------------|
| <b>Director/Publications</b>   | Rev. Tutai Nooana | Rev. Tutai Nooana |
| <b>Director/Social Welfare</b> | Ms Nga Teao       | Ms Nga Teao       |
| <b>Director/Youth</b>          | Mr. Daniel Apii   | Mr. Piniki Utia   |
| <b>Director/Evangelism</b>     | Mr. Ken Ben       | Mr. Ken Ben       |

---



# **COOK ISLANDS CHRISTIAN CHURCH**

(Ekalesia address and contact details here)

~~~~~



# **COOK ISLANDS CHRISTIAN CHURCH**

(Ekalesia address and contact details here)

